

R U A N D A

■ Kartzela zigorra ezarri zaie bi akusaturi 1994ko genozidioagatik

ARUSHAKO Nazioarteko Auzitegiak bizi arteko kartzela zigorra jarri zion atzo Clement Kayishema medikuari eta 25 urteko zigorra Obeb Ruzindama enpresarioari. Hutu etnia-koak dira biak, eta tutsien aurka 1994an gertatu zen genozidioan parte hartu zuten. Epaiak badu berezitasun bat: lehen aldia da auzitegi horrek epai bateratua ematen duena. Auzitegia 1997an sortu zen Ruandako genozidioko arduradunak epaitzeko. Hiru hilabete inguru iraun zuen genozidio hartan 500.000 bat lagun hil ziren. Gehienak tutsi etniako herritarrak izan ziren, baina, baita ere, hutu moderatuak.

I R A K

■ Gobernuak tropak igorri ditu Irango mugara, egunkari baten arabera

SADAM HUSSEINEN aurkako taldeen sarrera eragozteko, Irakeko Gobernuak tropak igorri ditu Irango mugara. *Al Haiat* nazioarteko egunkari arabiarren arabera, Bagdad beldur da Iranek bultzatuta, oposizioko taldeak Irakera sartu eta Husseinen aurkako ekintzak bultzatuko dituztela. Oposizioa kanpaina bat prestatzen ari da Hussein agintetik botatzeko, egunkariak kaleratu duenez. Gainera, kanpaina horretan EEBBen eta Erresuma Batuen babes duela esan zuen *Al Haiatek*. EEBBek aurrekontuaren 97 milioi dolar bideratu zituen iaz Irakeko oposizioari laguntzeko.

T U R K I A

■ Agintariak neurriak zorroztan ari dira Ocalanen epaiketa laster hasiko delako

ABDULLAH OCALAN PKK Kurdistango Langileen Alderdiko buruzagiaren aurkako epaiketa hasiko da hilaren 31n, Imrali uhartean preso dagoen kartzelan. Horregatik, agintariek segurtasun neurriak zorroztu dituzte. Epaietan izango diren guztiei segurtasun ikerketa egingo zaie, eta horren ondoren jasoko dute identifikazio txartel bat. Epaietak 15 egun iraungo ditu, eta hamar sesio egingo dira. Astebukaera batean soilik egingo da atsendena. Behin 15 egun igarota epaiketa amaitu ez bada, luzatu egingo da. Etenaldirik gabe egingo da saio berria.

L I B A N O

■ Al Fatako arduradun bat larri zauritu dute atentatuan

KHAMAL ABU DIB Al Fata erakunde palestinarreko buruzagia larri zauritu zuten atzo Libanoko Sidon herrian, lehergaiekin egin zioten atentatuan. Poliziak azaldu zuenez, Abu Dib autoaren atea irekitzen hasi zenean eztanda egin zuen bonbak. PAE Palestinaren Askapenerako Erakundeko talde nagusia da Al Fata, eta liskar ugari gertatzen ari dira Jasser Arafat lehendakari palestinarren aldekoen eta aurkakoen artean. Bestalde, Hezbola talde xiiak bere gain hartu du Libano Hegoaldeko Armadari egindako eraso. Armadako soldaduek Israelen aliatuak dira. Frantzia, berriz, prest dago laguntza emateko Israelen Libano eta Siriarekin hasi behar dituen bake negoziaketetan. Frantziaren arabera, Israelgo soldaduek Libano hegoaldetik alde egin behar dute lehenik.

Armen kontrolerako neurri berriak onartu dituzte EEBBetan

Aurreneko aldiz, lege murriztaileen alde bozkatu du Senatuak

Agentziak / Washington

Armen salmenta eta jabetza murrizteko urrats batzuk egin berri ditu EEBBetako Senatuak, arlo horretako kontrola areagotuko duten bi lege onartu baitzituen atzo.

Orain arte oso bestelako jarrera agertu izan du beti erakunde horrek, armen gaineko kontrola areagotzearen aurka azaldu baita —errepublikanoen botoei esker beti—. Dena dela, etorkizunean ere erraza izango da armak eskuratzea.

OSTEGUNEAN armen salmenta eta jabetza kontrolatzeko proposamenak eztaba- datu zituzten EEBBetako Senatuan, bigarren aldiz hamabost egunean, eta neurri murriztaileak indarrean jartzearen alde bozkatu zuen gehiengoak. Hain zuzen ere, 73 senadore agertu ziren neurri murriztaileen alde eta 25 kontra.

Bi dira Senatuak onartu berri duen legearen ardatzak: batetik, segurtasuna bermatzeko sistema berri eta seguruagoak izango dituzte armek, batik bat, umeek disparatzea eragozteko. Bestetik, erosleen nortasunaren eta aurrekari penalen kontrola areagotuko dute. Ildo horretatik, inoiz delituren bat egin duten pertsonen ez diete aurrerantzean armarik salduko.

Lehenago ere hartzen ziren tankera horretako neurriak, baina arma saltoki ofizialekin bakarrik. Saltoki horietatik aparte, arma azoka ugari egingen da EEBBetan, eta gune horietan ez zen kontrol neurririk hartzen. Etorkizunean armen azoketan ere erosleen historial penalaren azterketa egingo dute.

Aurrez esan bezala, hamabost egunetan bi aldiz bozkatu dute proposamen bera EEBBetako Senatuan. Aurrenekoan atzera bota zuten boto alde eskasaz. Izan ere,



J. SCOTT APPLEWHITE

Bill Clinton EEBBetako lehendakaria, bere emazte Hillary besarkatzen, herenegun Littletonen, sarraskia gertatu zen eskolan.

aurreneko bozketa hartan armen kontrola areagotzearen aurka bozkatu zuten Alderdi Errepublikanoko ia senadore guztiek, arlo horretako ohiko jarrerari eutsiz. Erriflearen Elkartea Nazionala (EEN) EEBBetako elkarte garrantzitsuenetako bat da, eta armen salmenta eta jabetza librea aldarrikatzen ditu. Alderdi Errepublikanoko

buruzagi asko elkarte horretakoak dira, eta gainera, EENk eragin handia du errepublikanoen aldeko botoa erabakitzerakoan. Era berean, arma ekoizleak presio talde gogorra dira.

Azkenaldiko sarraskien ondotik, ordea, iritzi publikoaren ikuspegia aldatzen ari da, eta ondorioz, errepublikanoak mugitzen hasi dira.

Herritarrak ohartu dira kontrol beharraz

■ ESTATU BATUARRERREK armen inguruko pentsaera aldatu egin dute azken aldian. Milioika dira uste dutenak etxe gehiegitan daudela armak —34 milioi—, eta ikastetxe gehiegitan ari dela hiltzen jendea.

Herenegun bertan gertatu zen tiroketa bat Atlantako bigarren hezkuntza ikastetxe batean. 15 urteko mutiko batek

sei ikaskide zauritu zituen Conyers herrian. Hori da azkena. Baina orain hila-bete 12 ikaskide eta irakasle bat hil zituzten 17 eta 18 urteko bi gaztek Coloradon.

Bill Clinton lehendakariak hitzaldi bat egin zuen atzo azken ikastetxe horretan, eta esan zuen armei buruz iritzi aldatu dutela herritarrek.

Ikastetxeetan ger-

tatzen ari dena filmetako bortizkeriari leporatu diote guraso, hezitzaile eta psikologok; eta, baita ere, guraso askok behar besteko harreta jarri ez izanari seme-alabengana eta ikastetxe batzuetako bigilantzia eskasari. Guztiek argi dute, ordea, armetan dagoela errua.

Kontua da armak oso errotuta daudela EEBBetako zenbait

estatutako herritarren bizimoduan. Gurasoengandik seme-alabetara igarotzen den ohitura da kalibre handiko errifleekin egiten den ehiza.

Ohitura horrek maiz hondamendiak eragin ditu: armak gordeta dauden bitrinak giltzekin itxia gurasoei ahaztu, haurrek armak hartu eta nahigabe tiro egitean.